

Uunga siunnersuut: Aningaasarsianit akileraarutit pillugit Inatsisartut inatsisaata allanngortinnissaa pillugu Inatsisartut inatsisaat

(Aningaasaqarnermut Akileraartarnermullu Naalakkersuisoq)

Saqqummiussissut**Siullermeerneqarnera**

Naalakkersuisut sinnerlugit inatsississatut siunnersuut manna aningaasarsianit akileraarutit pillugit inatsisip allanngortinnissaanut siunnersuutit assigiinngitsunik imalik saqqummiutissavara.

Manna siunnersuummi pisussat pingaarnarpaat tullerriaassavakka.

Siunnersuummi ingerlatseqatigiiffinnut nunatsinnit nuuttunut tunngatillugu nunap qimannerani akileraartitsisarneq atulersinniarneqarpoq. Malittarisassaq ingerlatseqatigiiffinni sinneqartoorutit sipaakkat akileraarutigeqqaarnagit nunatsinnit anninnaveersaarnissaannut atorneqassaaq.

Maanna akileraartitsisoqarunnaarnermi pigisanut, soorlu aktiaatit illuutillu aalaakkaasut, akileraartitsisarunnaarnermi pigisarisinnaasanut iluanaarutaasinnaasut kisimik pineqarput.

Kalaallit ingerlatseqatigiiffiutaat ukiuni arlalinni nunatsinni suliffeqarfimmik ingerlataqarsimappat, aningaaserivimmilu uninngasuutit aqutugalugit ilanngaaseereerluni annertuunik pigisaqalersimappat, uninngasuutit taakku malittarisassat atuuttut naapertorlugit akileraaruserneqassanngillat, tassa ingerlatseqatigiiffiup akileraartarnikkut angerlarsimaffia nunamut allamut nuunneqarsimappat. Ingerlatseqatigiiffik paarlattuanik sinneqartoorutit sipaakkanik piginneqataasunut tunniussaqaarniarpat, tamanna pissarsiarineqartunut akileraartitsinermik aallartitsissaaq. Tamanna pisariaqanngitsumik assigiinngitsumik pinninneruvoq, tamannalu aningaasat nunatsinni inuussutissarsiummik ingerlatsinikkut iluanaarutaasimasut, nunatsinni akileraarutaasarnissaasa qulakkeernissaannut tunngaviatigut naleqquppasippoq.

Taamaammat siunnersuummi nunap qimannerani akileraarut eqqunniarneqarpoq, taannalu ilanngaaseereerluni pigisat iluanaarfiusut naatsorsorneqartut atorlugit ingerlatseqatigiiffiup uninnermi akilertussaassavaa. Ingerlatseqatigiiffik unittoq akileraarummik uninngatitsinissamik, akileraarummillu Nunatta Karsianut akiliinissamik peqquneqassaaq. Ilangaaseereerluni pigisat iluanaarutaasooq ingerlatseqatigiiffimmiittoq, ingerlatseqatigiiffiup piginnittuutit piginneqataasunulluunniit tunniunniarneqarpat taava akileraarut akileraarummut akilerneqartumut pingaarnertigut naapertuuttussaavoq.

Uninnermi akileraartitsisarnerup allilernissaanut siunnersuutaasooq ingerlatseqatigiiffinnuinnat atuuppoq, tassanilu ingerlatseqatigiiffimmi ukiumi pineqartumi sinneqartoorutaasut ingerlatseqatigiiffinnut akileraarummut akigititaq atorlugu akileraarutaasarnissaat eqqarsaataalluni.

Siunnersuutit ilaanut uninnermi akileraartarnerup eqqunneqarnissaanut tunngasup ilaanut tusarniaaffigineqartut arlallit ernumassuteqarlutik oqaaseqarput. Tamanna tusarniaanerp kingorna

siunnersuummi allanngortitsinissanut aammalu nassuiaatini erseqqissaanissamut pissutissaqalersitsivoq.

Tamatuma saniatigut Naalakkersuisut naatsorsuutigaat, aappassaaneerinnittoqannginnerani allannguutissatut siunnersuutitigut akileraaruseriffiup piginnaatitaaffianik erseqqissaassallutik. Allannguutissatut siunnersuummi, tusagassiorfinni ilaatigut eqqasuutigineqartut aaqqiiviginiarneqarput. Eqqasuutaasoq ilaat tassaavoq, sivikitsumik nuunnermi imaluunniit nunami allamiinnermi akileraartinneqartarnermik kinguneqarnissaa. Eqqasuut alla tassaavoq ingerlatseqatigiiffiit akileraartinneqarlutik, tassa napparsimasoqarnerani, akiliisinnaassusiatigut nanertinneqarnissaat. Allannguutissatut siunnersuummi ajornartorsiutaasinnaasut taakku aaqqiiviginiarneqassapput.

Taamaattoq ingerlatseqatigiiffiit nuunnertik pissutigalugu unittut uninnerminni pisuussutiminnit ileqqaarneqartunit akileraarummik akiliinissaat naapertuuttoq, Naalakkersuisut aalajangiusimavaat. Taamaattumik ingerlatseqatigiiffimmi piginnittut, pisisulluunniit, ingerlatseqatigiiffiup uninnerani akileraaruserneqarnissaminnik ingalassimaniartut, ingerlatseqatigiiffiup nunatsinnut tamakkiisumik akileraartussaataaginnarnissaat, qulakkeertariaqarpaat.

Eqqanaarsarnissamut ulorianaat pinngitsoortinniarlugu ullormit siunnersuutip tamanut tusarniutigineqarnerata (10. juni 2025-mi) aallartiffianit uninnermi akileraartarnerup atuutilernissaata annertusinissaa siunnersuutaavoq. Tamanna nunap qimannerani akileraartalernissaq tunngavigalugu akileraartarnikkut angerlarsimaffiup nuunneqarnissaa pillugu aalajangiinissap ulorianarsinnaaneranut piareersimatitsissaaq.

Suliassaqarfimmut malittarisassanik sukaterinermut ilaasumik akileraartussaataitanerup uninnerani nalunaartussaataitanerup eqqunneqarnissaa naggasiutigalugu siunnersuutaavoq. Qanoq ilineratigut ingerlatseqatigiiffiit aalajangersimasumillu ingerlatsiviit akileraartussaataajunnaartarnerannut akileraaruseriffiup paasisaqarluarnerunissaa siunertaavoq. Nalunaartussaaneq ingerlatseqatigiiffinnut inunnullov inatsisilerisunut nunani allani aalajangersimasumik ingerlatsivilinnut atuutsinneqarpoq.

Ilanngaaseereerluni akileraartarnermut aaqqissuussap allilernissaani erngup nukinganik nukissiorfissat Namminersorlutik Oqartussat sinnerlugit sananeqartut ilaalernissaat ilanngullugu siunnersuutaavoq.

Ilanngaaseereerluni akileraartarnermut aaqqissuussap allilernissaani sulisartunut avataaneersunut akileraarutip suliarisarnerata pisariinnerulernissaa siunertaavoq, taakkualu erngup nukinganik nukissiorfiliassat annertuut sananeqarneranni sulisartuupput. Tassungalu atatillugu ilanngaaseereerluni akileraartarnermut aaqqissuussami, erngup nukinganik nukissiorfiliornernit iluanaarutit Nunatta Karsianukartassasut siunnersuutaavoq. Tamanna mittarfiliornernut atuutsinneqartumut assinguvoq.

Taamaasilluni akileraarutinit isertinneqartut nunanit allanit suliarthortuneersut ukiumi aningaasanut inatsiseqarfiusoq aqutigalugu Nunatta Karsiata aningaasartaani ataatsimut pingaarnersiuiinissami ilaalersinnaassapput.

Tamatuma saniatigut inatsisissatut siunnersuut aningaasarsianit akileraarutit pillugit inatsisartut inatsisaanni erseqqissaanernik allanik allannguineruunilu minnerusunik imaqarpoq. Tassunga atatillugu inatsisissatut siunnersuummut tassaniilu nassuiaatigineqartunut innersuussissaanga.

Taamatut oqaaseqarlunga siunnersuut Inatsisartunut suliarilluagassanngorlugu ingerlateqqippara.